

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- मुख्यमंत्री ओमर अब्दुल्ला होरें आखेआ ऐ जे सांझे जतनें दे राहें गै जम्मू-कश्मीर गी इक बारी पही देसै दी सभ्मनें शा बधिया सैलानी थाहर दे तौर पर स्थापित कीता जाई सकदा ऐ।
- भारत नै जम्मू-कश्मीर च किशनगंगा ते रातले पनबिजली परियोजनाएं पर तथाकथित मध्यस्थता अदालतें दे फैसले गी खारज करी दित्ता ऐ।
- मुख्य सचिव अटल डुल्लु होरें जम्मू-कश्मीर च तोढ़ चाढ़े जा'रदे राश्ट्री जरनैली सिङ्कें सरबंधी प्रोजेक्टें दी स्थिति दा जायजा लैता ऐ।
- आपरेशन सिंधु दे तैह्त्त भारत सरकारै, जंग दी मारै हेठ आए दे ईरान ते इज़राईल थमां 4 जहार 400 शा मते भारती बसनीकें गी सुरक्षित बचाइयै मुख्य वापस आहन्नेआ ऐ।
- विधायकें दिएं तन्खाहीं च बाददे सरबंधी हाउस कमेटी दे अध्यक्ष होरें आखेआ ऐ जे इस सरबंधै च रिपोर्ट, विधानसभा दे अगले इजलास शा पैहले विधानसभा गी सौंपी जाग।

<><><><><><>

CM FICCI

मुख्यमंत्री ओमर अब्दुल्ला होरें आखेआ ऐ जे एह सरकार ते सैलसफा कन्नै जुड़े दे सभ्मनें सरबन्धत धड़ें दी सांझी जिम्मेदारी बनदी ऐ जे ओह जम्मू-कश्मीर गी इक बारी पही देसै दी सभ्मनें शा बधिया सैलसफा थाहर दे तौर पर स्थापित करन ते कन्नै इस गल्लै गी बी जकीनी बनान जे प्रदेश दी एह थाहर लगातार बरकरार रवै। मुख्यमंत्री होर कल श्रीनगर दे शोरे कश्मीर अंतर्राष्ट्री कन्वेंशन सेंटर – SKICC च आयोजित इक बशेश कार्यक्रमै दरान बोला करदे हे। जम्मू-कश्मीर च सैलसफा खेत्तर च परतियै जान भरने सरबन्धी गल्लबात आहले इस कार्यक्रम दा आयोजन फिक्की ते जम्मू-कश्मीर दे सैलसफा मैहकमे आसेआ सांझे तौर पर कीता गेदा हा। इस मौके अपने भाशण च मुख्यमंत्री होरें आखेआ जे उं'दी सरकार, सैलानिएं दे तजुर्बे गी होर बेहतर बनाने पर केन्द्रित नमीं पैहलकदमिएं पर कम्म करै करदी ऐ।

हाल दिएं चुनौतिएं बारै बोलदे होई ओमर होरें 22 अप्रैल शा पैहले आहली स्थिति ते ओहदे मगरा बने दे हालात पर बी लोऽ पाई ते आखेआ जे पहलगाम आतंकी हमला बड़ा मंदे भागें आहला हा ते एहदे परैन्त सैलानिएं दी आमद च चानचक्क गै बड़ी मती कमी दर्ज कीती गई।

<><><><><><>

Court of Arbitration

भारत नै जम्मू-कश्मीर च किशनगंगा ते रातले पनबिजली परियोजनाएं पर तथाकथित मध्यस्थता अदालतै दे फैसले गी खारज करी दित्ता ऐ। मंत्रालय नै आखेआ ऐ जे भारत नै इस मध्यस्थता अदालत दी कनूनी वैधता गी कदे बी मान्यता नेई दित्ती ऐ ते एहदा गठन सिंधु जल संधि दी गंभीर उल्लंघना ऐ। मंत्रालय नै आखेआ ऐ जे पहलगाम आतंकी हमले दे बाद भारत नै सिंधु जल-संधि गी स्थगित करी दित्ता ते भारत हून संधि तैह्त् कोई बी जिम्मेदारी निभाने लेई मजबूर नेई ऐ। एह फैसला बन्ने-पारा आहले आतंकवाद गी पाकिस्तान दे समर्थन दे मद्देनजर लैता गेआ हा। मंत्रालय नै आखेआ जे कुसै बी मध्यस्थता अदालतै गी भारत दे इस फैसले पर सोआल पुट्टने दा हक नेई ऐ। बदेश मंत्रालय नै आखेआ ऐ जे एह फैसला पाकिस्तान दे इशारे पर लैता गेआ ऐ ते एह आतंकवाद दे वैश्विक केंद्र दे रूपै च पाकिस्तान दी भूमिका थमां ध्यान हटाने दी कोशिश ऐ।

<><><><><><>

CS Highway Projects

मुख्य सचिव अटल डुल्लु होरें जम्मू-कश्मीर दे बक्ख-बक्ख हिस्सें च तोढ़ चाढ़े जा'रदे राश्ट्री जरनैली सिड़कें सरबंधी प्रोजेक्टें दे कम्मै च हासल प्रगति दा जायजा लैने लेई कल इक बैठक दी प्रधानता कीती। इस मौके पर उ'नें सरबंधत डिप्टी कमिशनरें पर जोर पाया जे ओह ऐकड़े प्रोजेक्टें लेई जिमीं हासल करने ते खान्नां कड़्डने मतल्लक होरनें मामलें बक्खी चेचा ध्यान देन तांजे इस गल्लै गी जकीनी बनाया जा जे इ'नें कम्में च कुसै किस्मै दी कोई रुकावट पेश नेई आवै। बैठक दरान बक्ख-बक्ख एजेंसिएं आसेआ तोढ़ चाढ़ी जा'रदी महत्वपूर्ण परियोजनाएं च हासल प्रगति पर बी लोऽ पाई गई। बैठका दरान जेहड़ी बड़्डी परियोजनाएं दा जायजा लैता गेआ उ'दे च दिल्ली-अमृतसर-कटरा एक्सप्रेस-वे ते जम्मू रिंग रोड पर सुरंगें दे निर्माण सरबंधी प्रोजेक्ट शामिल न। मुख्य सचिवें होरें सरबंधत एजेंसिएं गी निर्देश दित्ता जे ओह इ'नें महत्वपूर्ण कम्में गी 31 मार्च 2026 तगर सबूरा करोआना जकीनी बनान।

एहदे अलावा मुख्ख सचिव होरें जम्मू-श्रीनगर राश्ट्री जरनैली सिङ्क सरबन्धी परियोजनाएं दा बी जायजा लैता जिं'दे च मरोग थमां डिगडोल तगर सुरंग, डिगडोल थमां खूनी नाले तोहड़ी दे हिस्से दा निर्माण ते मकरकोट थमां शेरबीबी इलाके तोहड़ी बक्ख-बक्ख निर्माण कम्म शामिल न।

<><><><><><>

CS VVP

मुख्ख सचिव अटल डुल्लु होरें जम्मू-कश्मीर दे तालमे ग्राएं च वाईब्रेंट विलेज कार्यक्रम दी अमल-आवरी दा कल जायजा लैता। केन्द्र सरकार आसेआ चलाई जा'रदी इस पैहलकदमी दा मकसद सामरिक तौर पर महत्वपूर्ण बन्ने आहले ग्राएं दी तस्वीर बदलना ऐ। मुख्ख सचिव होरें आखेआ जे इस योजना दे तैह्त ऐकड़े ब्लाकें च संपर्क सरबन्धी परियोजनाएं दा दर्जा बधाया जाह्ग।

<><><><><><>

CRPF Mock Drill

सीआरपीएफ दी 137 बटालियन लै कल संजा जम्मू श्रीनगर जरनैली शिङ्क पर श्री अमरनाथ यात्रा दी तैआरी दे तौरा पर इक मॉक ड्रिल कीती। सीआरपीएफ दी 137 बटालियन उधमपुर दे सैकेंड-इन-कमांड करतार सिंह होरें आखेआ जे उनें इस बारे इक मॉक ड्रिल कीती ऐ तां जे जेकर कोई आईईडी लाया गेदा होए तां ओह्दा पता किस चाल्ली लाया जा। उनें आखेआ जे एह इक अभ्यास ऐ जेह्ड़ा श्री अमरनाथ यात्रा गी दिक्खदे होई कीजा जा'रदा ऐ। उनें इस बारे होर जानकारी दिंदे होई आखेआ.....

<><><><><><>

Op Sindhu

ऑपरेशन सिंधु दे तैह्त अजें तगर कुल 4 ज्हार 415 भारती नागरिकें गी पच्छम एशिया च बने दे हालात दी वजह कन्नै ईरान ते इजराइल थमां सुरक्षत बाहर कड्डेआ गेआ ऐ। एहदे च ईरान थमां 3 ज्हार 597 ते इजराइल थमां 818 लोक शामिल न। जिनेंगी खास डोआरिएं राएं सुरक्षत बाहर कड्डेआ गेआ ऐ। विदेश मंत्रालय आस्सेआजारी इक ब्यान मूजब 14 ओसीआई कार्ड धारक, 9 नेपाली नागरिक, 4 श्रीलंकाई नागरिक ते 1 भारतीय नागरिक दी ईरानी घरै आली गी बी सुरक्षत बाहर कड्डेआ गेआ ऐ।

<><><><><><>

House Committee Salaries

विधायक दी तनखाह ते भत्ते च बाद्धा करने दी मंग दी जांच लेई बनाई गेदी सदन कमेटी नै कल श्रीनगर दे विधानसभा परिसर च इक बैठक सद्दी। इस बैठक दी अध्यक्षता कमेटी दे चेयरमैन सुरजीत सिंह सलाथिया होरें कीती। इस बैठक च अली मोहम्मद सागर, जी.ए.मीर, सज्जाद लोन, हसनेन मसूदी, पीरजादा फारूक, अहमद शाह, अर्जुन सिंह राजू ते मुजफ्फर इकबाल खान सनें होर सदस्ये बी हिस्सा लेआ। बैठक दरान अध्यक्ष होरें विधायकें, साबका विधायकें ते सहायकें दी तनखाह ते भत्तें च बाद्धा करने दी मंग गी सुनेआ ते इस मामले उपपर सकारात्मक बचार करने दा भरोसा दोआया। उनें दस्सेआ जे अगले सत्र शा पैहले इक व्यापक रिपोर्ट विधानसभा गी सौंपी जाग।

<><><><><><>

House Committee JJM

जम्मू-कश्मीर च जल जीवन मिशन दी अमल-आवरी सरबंधी मामलें दी दिक्ख-सुन लेई खडेरी गेदी विधानसभा दी हाउस कमेटी नै कल श्रीनगर इक बैठक लाई। कमेटी दे अध्यक्ष होरें इस इस मौके पर गलाया जे 15 अगस्त 2019 गी प्रधानमंत्री नरेन्द्र मोदी हुं'दे आसेआ रम्मेआ गेदा जल जीवन मिशन इक महत्वपूर्ण पैहलकदमी ऐ जेह्दा मकसद देसै दे हर इक ग्रामीण परोआर तोहड़ी नलके राहें पीने आह्ला साफ पानी पुजाना ऐ। कमेटी नै आखेआ जे इस योजना गी शुरु कीते जाने दे बेल्ले छड़े 16 इशारिया 7-1 फीसद ग्रामीण परोआरें तोहड़ी गै नलके राहें पानी पुज्जा करदा हा पर हून तस्वीर बड़ी हद्दै तोहड़ी बदली गेदी ऐ।

<><><><><><>

Kathua-Prost Aid

जिला कठुआ दे समाज कल्याण मैह्कमे नै आर्टिफिशल लिम्ब्स मनुफैक्चरिंग कारपोरेशन ऑफ इंडिया(एलिमको) दे कन्नै सांझेदारी च दिव्यांग जनें दे जीवन च बेह्तरी आहनने दे मकसद कन्नै प्रोस्थेटिक एड्स बंडने आस्तै इक कार्यक्रम आयोजित कीता। विधायक डॉ. भारत भूषण होरें जिला समाज कल्याण अधिकारी विक्रम सिंह हुंदे कन्ने कठुआ विधानसभा हल्के थमां सरबंध रखने आले दिव्यांगें गी 6 स्कूटियां, 6 ट्राइसैकलां, सुनने च सखाल आले उपकरण ते पैदल टुरने लेई सोटियां भेंट कीतियां। लाभार्थिएं मदद उपलब्ध करोआने आले प्रशासन दा धन्नबाद कीता। इस मौके पर बोलदे होई विधायक डॉ. भारत भूषण होरें आखेआ.....

<><><><><><>